

四庫全書

史部

欽定四庫全書

明名臣琬琰續錄卷十二

明 徐紘 撰

恭順侯忠壯吳公神道碑銘

李 賢

天順辛巳逆賊曹欽謀為不軌潛俟七月二日早朝入
內為亂恭順侯吳公先於是夜一鼓聞之即與其弟廣
義伯琮約總兵懷寧伯孫鏜走詣長安門告變於是禁
門不啟賊計遂窮舉火燒禁門公等率兵勦殺奮不顧

身賊雖誅滅公已捐軀矣嗚呼先機告變公之忠也殺賊喪元公之勇也然則逆賊之敗豈非公之功乎皇上間公之歿哀悼殊深輟視朝一日追封涼國公謚忠壯凡秘器諭祭賻儀之類悉從厚典復命有司為之營塚壙以安塋之蓋痛念勛戚之臣為社稷而死故報功之典倍蓰尋常也既而琮詣予泣且告曰先兄不幸歿於鋒鏑茲欲立石墓前以白於世非先生之文不可辭弗獲按通政司叅議趙君昂之狀公諱瑾字廷璋其先西

涼人祖諱允誠永樂中累以戰功封恭順伯父諱克忠
嗣伯爵洪熙初以戚里恩進封恭順侯正統甲子以征
敵功加太子太保己巳秋禦敵北邊力戰而死追封邠
國公謚壯勇母楊氏封邠國夫人叔父克勤官至左軍
都督府左都督亦同兄沒于陣追封遵化伯謚僖敏公
生而英銳襟度爽闊親賢好善未嘗以門第驕人以故
縉紳士大夫樂與之游相與議論古今講說道義而公
頗能識其旨趣尤閑武藝精騎射方其父叔禦敵之際

公亦在陣中發矢射敵洎父叔矢盡而亡公始就執其部長念公忠義之後釋之乃還京遂嗣父爵天順改元皇上復位公以勛戚隨侍應對稱旨自是日備顧問賚予甚厚尋命理左軍都督府事公益感激夙夜效勤一遭變委身則其允蹈忠義視乃父乃叔為無媿矣公生於永樂癸巳十二月一日享年四十有九配李氏故會寧伯之女有淑行封侯夫人生子男三長曰鑑次曰鏞次曰錫卜以是年八月日塋公於順天府房山縣之

新莊從先兆也銘曰世祿之家忠義無幾有若吳門展
也無比彼美忠壯虎視眈眈遵化之姪邠公之男忠以
捐軀壯以禦侮相繼如歸光昭中土飭終追榮惟帝之
恩非帝之私惟以報勲闡矣泉宮西山之麓秘器旅陳
穹碑載陸仁者有後公則成仁銘以貞之可千萬春

左都御史寇莊愍公神道碑銘 李賢

都御史乃糾慝繩違之任總憲度肅百僚權奸之所最
忌者寇公居是職五年矣持法嚴明見逆賊曹欽父子

兄弟恣意妄為乃率御史劾之欽等遂行反逆首害公
賊雖誅滅公命殞矣朝廷震悼特贈少保謚莊愍加賜
賻儀遣官諭祭令有司為營安葬蓋深念任事之臣遭
此凶禍而恤典宜厚也其子林泣且告曰先人不幸勿
獲全歸而墓石之銘不可以無託敢固以請辭勿釋按
知府張祝狀公諱深字文淵其先山西渾源人世多顯
宦曾祖廣仕元為提舉有才行見寵於世祖為擇宣寧
縣黑虎鎮之乾河里俾居之至國朝洪武初以間右給

省檄過保定唐縣止連順庄見其風土之美因占籍焉
今為保定人祖彥和父禮俱以公貴贈資善大夫都察
院左都御史祖妣宋氏妣李氏俱贈夫人公自幼警發
永樂中為郡庠生上言時務朝廷奇其人召入胄監時
山東要路軍需錢穀有弊政遣中貴人陳保孫往廉之
求國子生精敏者同事得公甚喜宣德初擢刑部主事
有勤能之譽尋陞員外郎丁外艱服闋復任益盡心刑
獄凡疑獄人不能辯者必屬公正統甲子用執政薦陞

山西按察司副使時天久不雨朝廷念刑獄有冤抑者
持委公錄山西諸郡大辟囚公察其情有矜疑者五十
餘人悉奏釋之又上邊務數十事多見采納丙寅四川
松潘夷不靖守臣請出師勦之朝廷念撫治者非其人
乃命廷臣推有風力者僉謂公可即日召至京師拜都
察院右僉都御史以往遂破賊寨擒其渠魁送京師諸
番讐伏獻盔甲刀劍三千童男三十七人駿馬四百餘
匹繼後入貢不絕公暇則撫恤士卒相地要害築關堡

城池六十處道路險峻者咸削之平以便儲運番夷酋
長或率其黨來見公宣布朝廷威德且諭以享福之道
莫不感化地方底寧朝廷嘉公之能進左副都御史加
食二品祿綵幣白金之賚甚厚一日得母報平安書潛
然出涕曰老母在堂久曠定省安能為懷即上章懇乞
終養朝廷優詔慰而留之景泰辛未召公還特加獎勞
番人乞留者十有七奏不從未踰月提督遼東軍務缺
人廷議復屬公遂假公以便宜之權賜白金綵幣慰勉

以往公至遼左威名益振乃積糧練兵畫防禦守備之計中外守臣咸敬畏之海賊李福挾妖術以惑山東之民聚衆萬人公得報畧不改容乃親率數百騎直抵海州遣都指揮周英授以成筭捕之遂獲千餘人公詰其具造亂之由得首惡者二十餘人械至京師餘皆釋之景泰甲戌北敵入境會總戎得公所議巡邊之策因其勢便遂斬首七十餘級獲馬六百餘匹公在邊歲久思親益切或與同事者及母老輒流涕終日不食累上章

乞歸不允丙子得還京議邊事時母年九十有四已感風疾曰吾得見吾兒即瞑目矣公悲泣懇求歸省至家母一見而逝公哀毀踰禮朝廷起公復任乞終制章凡三上不允天順改元皇上復位乃許公終制時臺長缺人思臣僚中老成剛勁無踰公者起復公視事進左都御史公威望日隆百僚敬憚上深嘉之寵賚優厚嘗召公咨訪政務但加老字於姓上呼之而不名益重公也公天性至孝雖居顯仕惟以不得養親為歎諱於世故

凡本朝舊典歷歷能記聽獄果斷人服其明未老即以家事付林綜理曰吾受朝廷重託惟職務是盡餘不恤也生於洪武癸酉五月七日沒于天順辛巳七月二日得壽六十有九配李氏累贈夫人生子男三長即林國子生次彬次桂卜是年十一月二十四日與夫人合塋於連順西岡之陽銘曰惟錐在囊脫穎斯見惟楠在壑昂霄可羨彼物且然而况於人惟人之傑衆孰與倫侃侃冠公早有大名歟歷仕途才智首稱兩鎮邊陲邊塵

不揚入總臺憲大振朝綱賊奸忌之竟為所害恤典有加遺澤未艾惟孝與忠在公則崇有志不餒名位攸隆墓碑我我昭此行實永閼泉臺曷具有極

姚冢宰誄并序

楊守陳

成化九年二月九日太子少保兼吏部尚書桐廬姚公薨于長安里第其子兵部郎中璧奉柩以歸嗚呼哀哉公諱夔字大章正統中鄉試省試皆第一遂為進士擢吏科給事中英廟北巡國勢岌岌羣臣議尊景泰帝

公贊其決敵犯都城召遼宣二藩犄角敵駭而遁公預其謀超陟南京刑部右侍郎轉禮部被命考官雲南三載奏績留任禮部景泰帝疾甚其部之長在告公強之出率百官詣闕問安退集東閣公倡言復太子衆翕然議定俄而英廟復位時方征苗又誣獄連襄府懼有變廼詔班師慰王中外大安蓋公之策也既而不悅於用事者復遷南京無何上思其忠驛召至京拜禮部左侍郎轉吏部尋陟禮部尚書國家頻歲多吉凶大禮或常

或變公皆據古酌今裁定允當嘗知貢舉剗革舊弊有
得士之稱今上嗣統之初及戊子星變及慈懿太后之
塋公皆草疏率百官上之有曰節嗜慾以保躬修禮法
以齊家出入有妨燕遊有度官爵勿濫授金帛勿虛費
土木勿妄興齋醮勿頻設又曰均愛六官以繁子姓親
決萬幾以臨臣民近君子遠小人皆人所不敢言者至
謂山陵宗廟聖孝所先綱常倫典國家攸重慈懿之塋
或違典禮在庭百辟將有言之宗室親藩將有言之天

下后世將有言之能保將來無據禮而改正者乎世尤
傳誦其言拜吏部尚書繼加太子少保先是藩臬由臺
省會舉臺省由天子親臨部僅選守令以下耳公至乃
悉委之連舉臺省藩臬十數皆稱職舉服其公明公並自
勵日思進賢退不肖以臻治平庚寅旱癘辛卯彗見壬
辰南方大水皆公上疏條陳天下大利弊乞行罷者以
十數多納而施行每議大典禮大政事衆環視莫敢先
或甲可乙否公徐一言以決上益信任嘗以災異兩乞

歸不允比疾遣賜醫藥中貴遺牢醴既薨賜賻祭塋贈
榮祿大夫少保謚文敏嗚呼自古優于政者多劣于文
高其名者或卑其位騁之前者槩蹶之後通于身者或
塞于子而公無一歎焉獨年齡未及乎耄耋勲業未臻
于極致故上下多悼惜之走也少欽英譽跂而望之長
挹令儀輒被知遇恒時觴咏笑談忘乎位與齒之懸也
孰謂公遽棄而殂哉哀嘆方殷而壁以誄請是安可辭
遂作誄曰越有大江其名粵浙怒潮驚濤轟霆湧雪其

上羣山崢嶸巖薜紫蓋錦峯富麗尤絕聚靈鍾神千載
一發篤生姚公間世之傑儀容魁岸識量廣恢烏有鸞
鶴馬惟龍駭百氏淹貫六行且該瑚璉之器棟樑之材
鄉書省選連奪倫魁文播天下厥聲若雷遂登甲第在
中給事有皂其囊可否獻替大輅北巡儲宮猶穉國覲
長君社稷之利發言盈庭首鼠疑避公奮而前遂決其
議敵犯京城國若旒贅謀夫孔多將怯兵脆公請發
符窺間遣銳徵兩藩兵刻期並萃犄而角之其畏勿斃

先聲所臨電閃雲際敵聞震驚遁返荒裔錯節既遇利器廼稱擢居重任舊都亞卿用刑惟恤典禮惟清察官遐逝黜陟幽明入奏厥績留居于京不擇夷險以篤忠貞倡議復儲獻謀安荆視竈弗媚復南其行不遠而復天寵薦增遷儀天官陟大宗伯恭敬神祇柔撫邊殲先帝陟天嗣皇登極大禮便蕃動皆中式一生禮闈令行弊革奸倖既驅譽髦斯得屢草章疏以率羣辟並拜偕進匪朝伊夕自內而外鉅細休戚備談極陳以匡聖德

暨論山陵明盡懇直上回天心卒正兆域進位冢宰寅
亮天工內自卿署外達藩邦下逮胥子小大窮通孰哲
孰否疇勤疇備旌別進退衡平鑑空誓登英傑驅去妄
庸庶官稱職民安歲豐時多災異公心忉忉屢獻大計
以輸至忠豈其憂瘁竟殞厥躬嗚呼哀哉昔歲有彗西
及台衡去冬長至天雨水冰何期妖孽殲我老成訃聞
於朝哀極聖情贈諡祭墓賜賻與并百卿辟士長嘆失聲
姻戚舊故雨涕填膺昔余髫髻已知公名長而翹企鳳

鳳星景壯登翰苑幸挹儀刑高位宿齒獎掖後生賡歌
酣嬉懼若舊盟六元方會一老遽薨俯仰今昔能不淚
零嗚呼哀哉憶公立朝百僚之上屹若泰山萬峯環
向奄云其類衆所安仰國有大事事有大疑衆皆視公
金鼓著龜遽云徂謝其疇之歸崇善應變九轉無滯琦
有奇骨可屬大事公最似之今也則逝相條便宜宣帝中興
沆陳災異米真守城公將五之今歸于冥萬方元元誰
惠誰撫九重穆穆孰匡孰輔如何昊天勿吊下土嗚呼

哀哉吉日攸召靈輶啓行祖奠載道執紼傾城素驥躋
躅丹旄悠揚春雲慘淡旭日淒涼渺渺長路蕭蕭故鄉
黃腸下定玉樹埋藏佳城鬱鬱畏夜茫茫芻狗灰滅石
麟蘚荒寒露碧草悲風白楊鴉啼狢嘯狐狸跳梁雍門
之言萬古悽愴嗚呼哀哉

吏部侍郎范公墓誌銘

楊守陳

公諱理字道濟一字士倫號省菴宋太傅覺民之後世
居台州自臨海徙天台又九葉矣祖諱彥善考諱起宗皆

呂公貴贈正奉大夫正治卿貴州左布政使祖妣陳氏
妣潘氏皆贈夫人公少敏悟端凝佔畢一呻輒能記縣
官嘗以聖壽節習儀鼓吹旗仗喧簇塾小生羣往觀公
獨若無所聞坐誦不輟衆異之長為縣學生傳書工文
山畜水湧譽髦皆自謂勿如甫踰冠中鄉試第一會試
第三皆有文鉞之梓擢壬戌進士高第宣宗嘗召進士
至齋宮親試用以得其才論公居第二賜白金五兩楮
幣五十緡既而例歸省還朝時重守令之選拜知江陵

縣作榜文諭民懇切且明盡民口熟之縣當三方之衝
過客旁午公嚴禁令雖權貴無敢索一錢先是民累歲
負租至十四萬都御史徵之嚴公曰民貧不能償也乃
召將卒家之佃田號畸零戶者論之曰世言戶役既佃
田立戶而免役可乎遂定其等俾各出募役之米因以
償負租畢完且平訟謠勸樹畜卹窮振弱禁奸招逋訪
孝子節婦及忠賢之裔謹學校正禮俗民慶未始得也
以舊令復遽去用薦知德安府亦先榜諭吏民大率如

江陵教養之政後悉踐其言每歲必再按屬以省耕收
廉利弊每季必命題試諸生而第之拔其尤置府後堂
暇輒躬為其師道隨州民數百家田為楚府護衛所占
猶輸租公備奏盡歸其田民感甚皆立主而生祀之滿
去以最異超陟福建布政使時大兵勦賊鄧茂七等公
司饋餉善調度兵皆給食民不加賦朝廷嘉其功賜綵
幣表裏各二楮幣千丁滿夫人憂起家拜貴州左布政
使初貴州草創即驛為布政司以夷之難擾也久莫能

改作公奏徙貴州前衛于他所以其地造司數百楹不
擾而就土官無訾勿能襲職者十五六公悉俾襲更無
敢難常移文以通夷情間抗章以蠲逋稅餉兵春以糧
秋以銀便省漕四川湖廣饋糧貴州艱甚公俾代糧以
銀為之糴減時直十二貴民既獲利而川廣被惠尤溥
秩滿擢南京工部左侍郎南京創自國初歲久凡百皆
敝葺造費鉅公不欲煩民廼請鬻蘆場之新葦抽分局
之腐木辟碎嚴內府庫之苦瑣布帛通售銀殆萬兩又

請南畿獄囚贖者隨葺造所需而納于是自文廟宮殿
內外諸署城樓街表或造或葺動輒百千間既修巡狩
諸般數百兵食諸器數萬皆以次成而民不知又奏各
處饋南京糧者自船抵倉多所費每米石費三斗請兵
就其船人支三月之餉官取費米歲可萬石以備賑貸
從之果利尋轉南京吏部左侍郎考課公明百僚咸憚
之嘗請老至再不允滿考赴京途遇疾輿就其子進士
綱之第輒舉手加額曰無以報朝廷無以報朝廷遂薨

成化癸巳五月四日也壽六十四上聞嗟悼命有司祭
塋之公配湯氏累封夫人先公卒塋于縣西長洋之原
公以薨之年某月某日合葬焉子男六長綱次即綱次
紈次曾同次昌齡蔭國子生次玄齡補縣學生女二人
孫男女十人公早孤事潘夫人孝處昆弟友居官清慎
忠勤凡政皆精慮而果行之一以惠利為主故江陵纔
七閱月而去之日民遮阻不克則奔餞數千里慟哭而
返少保楊文定公溥聞之曰世有為縣七月遽得民如

此怡愉各書所薦皆公名馬公謂公賢而文宜督學之
職文定公曰縣既得民矣俾任民牧尤宜馬公諾合詞
以聞廼有德安之陟逮其去德安去貴州也民祖餞如
江陵尤甚德安又勒去思碑于府治焉自庚戌逮今同
時輩行無在者歸若魯靈光之獨存而得業聞望隱然
動天下殆書所謂耆壽俊史所謂名大臣者其為文章
操紙筆立就率溫厚坦明深切事理嘗著讀史補忘天
台要畧皆八卷詩經集解三卷德安府志丹台稿皆十

卷藏于家。網將奉柩還葬，乃具狀泣請。余曰：先君治命，固曰銘屬先生。嗚呼！余童而慕公，壯被知愛，深矣。公嘗入賀萬壽節，退燕余第。同燕者，今戶部尚書兼翰林院學士商公故太子少保兼吏部尚書贈少保姚文敏公國子生故盧君楷。今余弟守陞凡六人，皆浙解元也。三公勲德位望冠當世，而公與文敏對居兩京天官，豈惟渾之儀固四海之表也。今文敏殂矣，公又繼之，悲感可勝道哉。銘固晚生之職也。况公治命其敢辭銘。銘曰：太公國

齊簡禮從俗僅五月終報政何速公為江陵政非呂望
加其二月仁滂惠洋去不能馳穉耄遮阻執袪號啼如
子失母黃霸守郡治莫與夷及為丞相勲烈小虧公自
令長郡守方伯入副尚書居守是職材非偏長所在有
績于赫厥聲不損彌益晚秀獨揚行輩凋盡一老之遺
天胡不憖有馨其俎有澤其封皆帝之賜恩榮始終台
有赤城萬古絕只公之休光庶或與比

毛宗吉傳

楊守陳

毛宗吉餘姚人也名吉自少攻文學尚氣義言論侃侃不少屈舉進士授刑部廣東司主事嚴明廉鯁訊囚多立驗權貴無敢撓之苞苴雖半號一縷必峻却山東人有居京者女歸壻反目令女逸匿之山東因誣壻殺其女權嬖右之壻誣伏坐死獄疑當讞已更數司閱數歲適宗吉讞得其情密訪女獲之壻乃免一部推服京城奸民有晝竊人家貨賄謾途人剪其囊者謗呼小李宗吉捕得其魁垂死之其黨稍戢錦衣衛卒追百司鈎撫

傳政書片楮以聞輒報可至有被誣坐族者公卿皆重
足待之干請必徇然或犯罪例入廣東司莫敢誰何宗
吉獨法治之如他犯指揮門達怙寵擅威福能生死人
在俄頃百官遇之途皆躍馬避恐後宗吉獨與舉鞭抗
揖于是皆銜之偵其過百方無所獲一日宗吉以失朝
下錦衣獄衛卒羣吠脅之宗吉徐曰有國法在爾曹奈
我何達聞益怒喉健卒掄巨挺挺之見骨幾死猶行行
自得療數月方愈人語之蓋少貶徇俗宗吉笑不應復

職一如故輿論賢之名聲籍甚陞廣東按察司僉事分
巡潮惠二府黜墨吏摧強宗殄海寇民用寧輯葺滿代
還民乞更巡一載從之劇賊楊輝據程鄉縣之寶龍峒其
黨魯玉謝瑩分據石坑龍歸二峒西山剽虜刻期攻縣
治宗吉曰先人能奪人之心亟調官軍集民壯僅七百人
倍道馳至石坑賊三千人出拒宗吉定計令兵佯退以
致之賊躍而進乃督兵殊死戰良久麾伏兵起遂克之
縛曾玉明日乘勝破龍歸擒謝瑩又明日攻寶龍賊伏

山上篁竹間發弩矢我軍阻深谷勿克進宗吉乃簡敢死士百人人懷十石子從間舉道攀蘿陟篁竹後投石子亂擊之揚輝殪餘衆驚潰凡攻三峒斬首五百級俘六千人獲白金八千餘兩他物稱是奏未報時廣西蠻賊滋蔓高雷廉三府尤苦之衆推宗吉往巡道路榛塞村落為墟數百里無人煙攬轡四顧悲且憤慨然有削平禍亂之志至廉州內官監珠池者方繫民數十人徵賄箠擊幾死宗吉嘆曰民幸不死于賊者又死于此何

忍也遂盡釋之凡黨內官悉寘之法衆口稱快至雷州
報賊叔大者體村遽檄都指揮石鼎出擊鼎懦不敢宗
吉素知海康縣知縣王麒忠勇可任即命麒率民壯偕
擊賊走之斬首數百級奪還人畜無筭賊入吳川縣分
為三其一由水道宗吉覘知復命麒以舟兵追破之其
二聞潰去相戒勿犯自是部內稍寧因條平賊方畧奏
之上嘉嘆陞本司副使降敕獎諭委總廣東軍務宗吉
益感激思報以滅賊為己任惠州河源縣告急即兼程

進兵敗之鋪前又敗之長峯徑口賊遁至清遠縣守將
都督僉事張通遇之戰北宗吉亟進援賊見其幟呼曰
毛家軍來矣遂奔潰凡斬首三百級奪還人畜數千踰
月廣州新會縣告急宗吉提兵至燈下斬賊首數十級
賊遁入陽江縣營于雲岫山仕峒我師夕至比明擊敗
之賊棄營走山下我師扭勝突入其營陣亂賊乘之刺
殺前驅潘百戶有哨指揮閻棄師遂潰宗吉勒馬持刀
大呼曰劄住劄住潰已不可遏從騎勸宗吉退避宗吉

叱曰爾去吾誓不與此賊皆生益奮而前揮刀砍賊不
已力屈被害成化元年三月一日也是日晝夜晦烈風
雷雨大作山谷皆震動逾七日得屍貌猶若生櫬還官
吏士民弔哭祭奠相屬事聞贈通議大夫廣東按察司
按察使遣廷臣諭祭賜其家米四十斛布四十足錄其
子科為國子生論曰嗚呼兩廣之毒一何酷耶自昔任
邊事者賊至偽不聞聞亦不往往亦不戰戰亦不力甚
者十餘賊驅子女數百過城下亦莫肯以一矢相加偵

人以告則詬箠之賊去乃始耀兵入墟落殺掠齊民以
為功王師兩征猶踵其故智權貴右之濫封濫貴不吝
也朝奏捷夕告急不詰也陷城棄師失律之將不戮也
非誨之縱賊殘民耶亦無異乎毒之酷矣獨一宗吉如
兩廣何人孰不死而宗吉聲光將與日星照終古彼偷
生倖富貴者竟何如哉竟何如哉

明名臣琬琰續錄卷十二

欽定四庫全書

明名臣琬琰續錄卷十三

明 徐紘 撰

南山黃先生墓碣銘

楊守陳

山環吾郡而其南若金峨諸峯尤峻秀先生樂之故自號南山而學者稱南山先生無異詞先生嘗仕有官階矣皆不稱其官獨舉其號而先生之者崇其道也先生之道性乎天而成于自得其學聖賢為一鵠以知行為

兩輪嘗曰學聖賢一分便是一分好人又曰明理務在讀書制行要謹獨此其所由道而學也方其少時已負文行之譽及其壯強益修耄老不懈德足重於衆功足昭于時言足立于世其可謂有道而甚文者歟先生諱潤玉字孟清世為鄞人曾祖長卿仕元蟬浦巡檢祖啟翁隱卿授徒父良以先生貴贈文林郎行在交趾道監察御史母嚴氏贈孺人生母史氏封太孺人先生方五歲侍母病夜不就寢家人已稱其孝六歲就坐立屹然不

與羣兒狎書過目輒成誦師奇之十歲行道見遺金不
拾途人悉嗟異歲十二聞郡守王公璉肇舉鄉飲酒禮
于郡庠往觀之默識其儀歸書于冊師愈奇之歲十有
三時改元永樂命江南富民實北京其父當行先生詣
官請代官少之對曰父去日益老兒少去日益長官異
而從之踰年抵京受廩北城外十里所沙漠寒沍茫無
人煙先生與同役築室城北閭傾訾給徭賦墾圃鬻蔬
以為生人或不堪其勞庠先生安之稍隙輒肆力于學

以己心為嚴師而蘄造乎聖賢擇然後語確不可易焉
揆然後動端無所苟焉京有富翁僅一女招先生寓宿
其家而同賈先生辭或問之曰瓜田不納履也其慎行
若此里中弟子多從之因教且學間為文辭不作組麗
蘄刻之語而理致淵永人喜誦味之補郡庠生京闈鄉
試擢禮經魁會試授建昌府學訓導丁文林公憂改訓
南昌府學蔚有聲績用薦拜行在交趾道監察御史出
按湖廣罪斥藩臬郡縣之不職者至百有人威望赫然

英廟即位以學政衰弛命廷臣舉有學行者為憲臣以
董之楊文貞公以先生薦遂陟廣西按察司僉事屏浮
藻獎俊賢士風丕變時寇起軍興都指揮吳某妄掠子
女萬餘口先生劾而歸之副使李公立人民死罪且數
百人亦為辯出之萬口稱快南冊衛在萬山中瘴甚戍
卒歲死或幾半為秦移于夷曠之地人感之至今丁史
孺人憂改湖廣按察司布憲亦嚴巡撫都御史李實張
甚藩臬皆折節下之先生獨無加禮而連黜墨官二人

又皆其鄉戚也故發憤誣奏先生不暗刑律先生弗辯也左遷和州含山知縣浚麻湖以復逋租閱蘆場革其積弊徭均訟平民感悅之請老致仕尋以子隆貴封承德郎南京刑部廣東司主事間居簡出日惟玩味經義無厭足平生著述甚富以朱子嘗欲編禮記附儀禮乃取儀禮所為四卷而以禮記比類附之不類者附諸卷末首亦各有意義又以五禮獨缺軍禮因取周官大田禮補之而以禮記諸篇載田事附焉別為一卷通五卷

皆為之註釋曰儀禮戴記附註以小學四書諸經註家
或遺或悞撰經書補註以大學中庸旨皆淵粵撰學庸
通旨以禮記深衣制十有二幅鄭氏誤註為裳而玉藻
長中繼掩尺註亦誤撰考定深衣古制以四明新志蕪
撰寧波簡要志以道德經陰符經古註皆昧各為之註
嘗因安遠侯溥問古兵法為註孫子其他備論理事曰
南山錄雜著詩文曰南山稿皆藏之家居二十載壽八
十有九而卒時成化丁酉五月二日也卜某年某月某

日望某處隆具狀屬余銘嗚呼詩有之雖無老成人尚有典刑老成人之重于典刑也尚矣吾鄆風俗自古樸淳大里之高節董淡之純孝可徵也宋慶歷淳熙以來諸老傑出表以馴行闡以正學既駸駸于古矣有國初士猶修德行礪名節尚道學而文藝仕進不甚貴之逮于今則文藝日以盛仕進日以繁而向所謂德行名節道學者或莫知省于是老成人凋謝盡矣而先生歸然若魯靈光之獨存後生小子有志於古者尚可憲而則

焉今亦已矣噫痛哉先生性剛介寡交游其所稱許者
四方若李文毅公時勉薛文清公瑄不過數人而鄉邦
尤鮮獨與守陳祖考棲芸先生雖顯晦不倫而以道德
相契往還間人見兩先生皆偉貌豐髯莊重嚴毅畏之
若神莫敢即所談惟法性道之淵文辭之粵未嘗一語
及世故守陳少撰杖履侍側聞緒言為多長與隆同舍
學且久逮先生歸老尚時獲親炙之故知先生為深宜
隆之以銘屬之也先生室范氏封孺人贈繼室以舒氏

五男長性永新訓導次教次道宣義郎次隆以進士累
官四川按察司副使廉毅公雅政聲章其次達國子監
生孫男廿有七曾孫男十有九先生位不滿德而年齡
之邁子孫之顯且若償之矣况又有不朽者在乎銘曰
在古聖人未始不學其學伊何道德矩矱數為勲勞著
為言議以澤當時以覺後世譬彼天道生物為心霆雨
發育日星照臨是二道者益難乎備姬孔至哉程朱其

次爰及吾郡二敏

豐清憲
高憲敏

四先

素揚
舒沈

深寧

王應麟

文潔

黃東

亦各有傳晚生黃公天性孔懿自其少時克已孝義長
而好學昕夕簡編心驗躬履誓趨聖賢明理在書謹行
于獨發是二矢射彼一鵠乃齒鄉論乃作校師道遵教
洽厥聲四馳廼陟於朝六察是職茹雪噬冰隼翔鷹擊
天子曰咨學政日靡慎簡憲臣俾振而起八桂成林丹
檄之極鳩舌卉裳在泮挾策先生不鄙示之周行沃醉
俾醒瞽豁而明徙涖湖湘專典臬事驚車所臨風聲逾
厲彼貴方逞我守其恒呶訾慄斯則匪我能攻詆既成

用率百里斷楹為杙大匠斯鄙素位安命何怨何尤利
興害去惠澤滂流尚丹其心遽白其髮飛不盡韓歸休
于越有子克肖亦豸其冠孫曾蟄蟄敬恭暄寒間居簡
游舊著是閱漬墨磨丹之死不輟儀禮為經傳惟戴記合
而註焉晦翁之志經書補注庸學指歸有刊彼誤有拾
此遺道德陰符暨孫武子亦各注之以闡厥旨深衣制
幅誤註為裳千載之謬一朝用章格言孔多厥有別錄
餘文暨詩亦溢于續古者不朽惟德功言先生庶乎鄉

之前賢嗟彼蚩蚩耽寵與利行朱懷金以炫于世奄其
逝矣湮滅無聞孰與先生身沒名存我銘斯立匪但焯德
且以砭愚庶其有懌

右僉都御史汪公神道碑

楊守陳

都察院右僉都御史汪公被命整飭薊州山海邊備兼
巡撫順天永平二府越二載得疾請歸未及報疾已亟
輿至京師之居第卒成化十六年四月二十三日也年
纔六十有三自將佐守令下逮兵民皆悲慕不已交章

列其行治請賜塋祭以寵異之制曰可舊典凡四品以上賜祭三品以上加祭賜塋今公官僅四品而塋同三品實異數也非有大得乎下而深獲乎上曷克致是公姓汪諱霖字潤夫廬之六安州人高祖富德安府同知曾祖景道莘縣知縣有能譽嘗被賜金帛之徵祖克敬不顯父洪麻城縣學教諭以公貴累封大理寺丞母閼氏累封太恭人公承家訓起州學登進士第拜監察御史出按雲南操已慎布憲公讞獄多所平反吏民安之

丁封寺丞公憂復職按浙江持其素益勵時錦衣衛指揮門達方秉權焰焰其子商于浙自鎮守官以下皆曲意悅之以公獨不禮也歸諧之達怒遣校尉偵之卒以無罪也還掌江西道適今上嗣大統言官劾門達抵罪薦前都御史王公竑李公秉皆復任天下稱快公預力焉先是兩廣蠻寇出沒且十載屢征不克至是命趙都督同知輔率師征之遂命劉御史慶與公察官軍有主事與冒功者皆寘之法公與劉協心中令師肅然憚之自

京抵兩廣所過按堵且以策贊師擣賊巢穴如破竹既而審首級有妄者斥之俘獲有係吾民者縱還其鄉凱奏論功拜公大理寺丞秩滿陟本寺右少卿尋擢都憲被飭邊撫郡之命遂乘驛徧所治戒將佐練士卒葺城堡樓櫓簡器械軍聲用張敵莫敢犯且厲守宰俾勤恤民隱無或迫違舊例邊軍糧餉永平府給古北口薊州給山海關皆以車運費重而途艱然緣邊米價頗賤公請以銀代糧分給之兵民兩便皆歡欣戴感之公性孝

友喪父哀甚迎母就養京邸選都憲考最例進階公請
輟階進母太恭人之封及死惟以弗克終養為恨焉至
公之為人寬厚溫恭臨政詳慎未知徽赫赫名然其所
治無論朔南人皆悅慕之公娶張氏封張孺人子男五
人長曰睦陰陽訓術次曰曉曰暉俱州學生又次曰昉
曰琅孫男十有二人睦輩卜塋于其州之地既請丘祭
酒仲琛銘周侍郎堯夫表矣乃復請余碑焉余與公有
雅弗克辭系之銘曰六惟古國舉陶所封於今為州公

家其中公之高曾以選於今三世顯榮公大厥紹奮登
甲科遂典六察威惠所加六詔兩浙兩廣麻沸帝命師
征公監以憲有聞無聲孰狼孰貪孰猛如虎孰敢于令
以犯吾斧運籌位帥師搗賊窟封豕長蛇是絕是忽矜
彼係累有我赤子從而釋之還厥宅里奏捷第勲承于
大棘貳卿無何都憲是職驚車按邊將士用銳高城深
壕敵駭而喙督守與宰字其下民雨稿俾秀化愁為欣
胡不耄老僅耆而逝小大邇遐交傷並喟天子有詔斧

封魏魏刻石墓道過者式之

少詹事柯公傳

王 傑

學士柯公諱潛字孟時別號竹岳興化莆田人其先晉
江人五代時有諱寶者官大理評事徙莆之武盛里生
宗戶部員外郎峽戶部主事長陽尉濟長陽生朝陽令
璿璿之孫贈承事郎昱再徙邑中安樂里今所居何山
是也承事生海豐令新之由海豐二世海陽尉繼海陽
以下又六世至公高祖憲孫曾祖君寶祖德平皆不仕

父原琪用公貴累封奉訓大夫尚寶司少卿兼翰林院修撰配戴氏累封宜人公生有奇質穎異絕人數歲能作詩十五能為舉子程文從鄉先生林知縣庭芳方行人游補邑庠生正統甲子領鄉薦當赴會試以未忍離親未果行遂携書入蓮峯僧舍講讀不輟戊辰會試中乙榜辭弗就教職入胄監攻苦數淡益肆力於學景泰辛未再至禮部遂中甲榜進對大廷賜狀元及第賜朝服冠帶公上表謝越數日授翰林修撰公丰神峻整言

動謹飭是時翰林諸老多在咸愛重之為之延譽未幾
賜五倫書正經四書尋用薦入經筵自是凡朝廷用人有
制作加恩典公皆與焉壬申四月陞右春坊右中允兼
修撰五月預修歷代君鑒書成賜白金千兩綺二表裏
甲戌二月禮部會試為同考試官五月預修寰宇通志
三載滿授勅命進階承德郎推封二親及妻戴氏繼室
俞氏丙子五月通志成陞司經局洗馬仍兼修撰加賜
白金文綺八月考應天府鄉試舟維淮揚有舉子鬻私

者暮夜投公公叱之彼固以請以所賂遺置公前公怒命執付有司治以法是秋場屋肅然比揭曉咸稱得人還朝乞歸省未行英廟復辟改元天順更授公尚寶少卿兼職如故仍許歸省已卯二月命修玉牒庚辰春命偕呂學士原考禮部會試十二月命充東宮講讀官尋給命進階奉直大夫加封其父母妻癸未二月復命偕陳學士文考會試會場屋火罷甲申今上即位以隨侍恩陞翰林院學士三月有旨選進士年少質敏者李

東陽等十八人入翰林院庶吉士命公教以古文詞學
八月上御經筵勅兼經筵官仍賜白金三十兩寶鈔三
千貫文綺二表裏九月奉旨纂修英廟睿皇帝實錄
成化改元八月考順天府鄉試九月玉牒成賜宴兼賜
白金文綺寶襖丙戌廷試典讀卷賜鈔千貫是月再奉
旨教庶吉士林瀚等二十四人十月賜新刻貞觀政要
十二月命掌翰林院印丁亥五月實錄成陞詹事府少
詹事兼翰林院學士賜白金三十兩金織綵段三表裏

折衣羅三表裏賜宴禮部十月賜大明一統志戊子二月命日侍經筵講讀自辛巳迄戊子凡遇午節輒賜牙骨聚扇上有御製清暑歌解愠歌及諸家繪畫金織扇袋五色圓壽絲縷虎頭條畫艾虎七月有詔議慈懿太后山陵事內閣大臣先進章公率僚屬繼進論合塋於禮為宜明日文武羣臣復繼進未得者公復具疏期以死請曰朝廷大事臣子大節舍是奚所用心頃之俱召至文華殿諭可其奏衆懽呼而退十二月賜經筵儒臣

七人襲衣冠履公已聞父喪上命即其家賜之既而有
司為少卿公請祭命并與塋蓋異數也公感激御哀就
道抵家不入中門寢苦枕塊不脫經帶擇塋地于所居
東一里許和溫山麓以不忍離喪次圖繪形式付其弟
通州學正江董成之時母戴宜人在堂事之逾謹備極
甘脆己丑九月季弟澍病親為調藥比卒殯殮皆厚後
朔望易期服哭失聲而後返衣衰居苦次君子謂之有
禮庚寅正月戴宜人屬疾越五日卒公哭踊絕而復甦

朝廷聞之復遣官諭祭辛卯四月有詔起復祭酒缺員
久難其人上知公剛方將用之以厭士論公聞命具疏
乞終制大畧忠與孝豈有二致事君事親初無兩心使
親喪可短則他日所以事君者可知矣上覽疏許其終
制公素無疾至是以久居苦塊患在是風痺未平而寒
熱繼作公自知不起呼學正君與之訣瞑目而逝時癸
巳八月十一日也年五十一訃聞上悼惜遣官賜祭復
命工曹營塋公娶戴氏先卒繼俞氏南京禮部侍郎綱

之女子三長森次林戴出季宗大側室王氏出女二公
天性孝友事親養志友愛二弟撫育從子尤極恩意念
季氏早沒恣以先公所寢室讓與其子室壁而自與學
正君別作室于都廳東西以儉陋自居人以義稱公稟
氣峭直操行取舍發為文章嚴整有法類其為人具為
詩新清微婉尤有風致其性喜遊供職之暇時偕二三
知己窮覽勝槩雅歌投壺分韻賦詩襟度豁如也既綜
院章即詞林後團結清風亭亭下鑒池蒔蓮決渠引泉

公退宴坐其中又翛然若真登瀛洲者至于遇事感發
言論侃侃揚擢古今較然自負如公者可謂動靜不違
守之以正者矣故雖官庶僚已繫天下之望位日通顯
望日益重雖嘗以聖賢之學啟沃聖心其平生所蘊蓄
抱負蓋未及少施于天下故其歿也匪徒士君子傷之
雖天下蒼生其素所屬望者蓋不能無缺然也使天假
其年上柄用之其所經綸贊理宜何如哉予聞之宋儒
明道之卒也或有問於富韓公公曰伯淳無福天下人之

無福又不知今日之知公者有如富公之知明道與否也與忝與公同年及第同官翰林二十年辱公契受為深公易簀時其家人咨以後事公無他語第曰爾往南京見王學士訪之噫顧予何人敢承公死生之託耶閱月訃至予既為位哭之謹論次其平生以為傳授其子孫宗吏使傳焉

太常寺卿王公墓誌銘

王 與

公姓王氏諱獻字催臣號退菴杭州仁和人也曾祖諱

思誠元醫學提領祖諱性安冠帶醫士贈太常寺卿兼翰林院侍讀學士祖母楊氏贈淑人考諱智初封編修後累封贈太常寺卿兼翰林院侍讀學士妣顧氏亦累贈淑人繼母俞氏封太淑人公天資穎異羈貫知讀書記誦日數百言不煩熟復即終身不忘十五學通經肄筆作舉子程文十七領鄉書明年景泰辛未登進士第與狀元柯潛等二十八人同進學東閣賜居第給太官酒饌及膏紙費命內閣大臣典領之蓋不別立師

不出就外署一如永樂初科故事公感際遇益肆力於學工古文詞在同年中最號敏瞻時公猶未娶吏部侍郎淳安項公見而奇之以女妻焉癸酉授編修與修纂宇通志陞修撰天順初乞歸省賜路費鈔逾年還朝命入內館授中貴人書癸未春同考會試會貢院火秋復試復為同考是科先後兩入簾不改命者惟公一人丙戌修撰秩且滿先公訃至即日陞辭星行抵家治喪塋戚易兩至暇日與鄉人接恂恂厚謹無一毫早達貴侈

之態人以為難尋用薦起復之公疏乞終制服闋陞左
春坊左諭德兼修撰庚寅命充經筵日講官賜大紅織
金襲衣束帶冠履辛卯再賜大紅羅衣一襲是秋主考
順天鄉試壬辰充廷試讀卷官賜寶鏐千緡未幾陞翰
林學士癸巳賜金帶本朝學士非典密務侍日講者皆
不與是賜益異數也乙未復充廷試讀卷官賜寶鏐千
緡丁酉朝廷用儒臣議追崇先聖禮樂遣公祭告闕里
北還適所嘗與修宋元通鑑成陞詹事府少詹事仍兼

學士戊戌皇太子出閣命侍講讀于文華殿又命偕學士南昌謝公教庶吉士梁儲等于玉堂外署滿三載乞恩移封父母詔許之今後凡朝臣五品已封者即四品不封先公既贈諭德又加贈詹事皆兼兩銜妣亦由宜人加恭人人罕與為媿辛丑主考會試壬寅修文華大訓成陞今官甲辰丁未再充廷試讀卷官復賜寶鈔蓋自擢第八翰林于今三十有七年先後握院章者十有六年而年已五十餘後進推公為先達知己期公於大

用公雖謙不自居而亦頗自信其必至然訖不登樞筦
履要劇以少展其所抱負君子惜之所謂行止非人所
能為而天實為之也公為人性度夷坦襟宇澄霽與人
交洞見表裏為人謀不擇利害嘗有同官最厚者卒而
子幼家事為二弟所將公忽然不平乃拉二三友為之
處分不得逞遂造為無根之謗以誣公好事者從而扇
之公雖弗為辨而亦不能釋然于懷卒之以此齟齬終
身而不克永年於是識者又深惜之謂人衆勝天而不

可盡諉之命也公學春秋三傳作詩文有奇氣好論而切於用事作字亦飄逸類其為人客至對奕終日其所自奉雖儉而供具必豐比遭謗則罕與人接過親舊亦寡言初拜官時年方少而癯眇中歲漸豐腴比年乃更羸然如不勝衣蓋時已屬疾猶日侍朝供職相知者纔一再晨不見而公已易簀矣成化丁未八月四日也享年五十有四訃聞上憫惜之贈禮部左侍郎遣官諭祭命有司營塋歿後三月兄惟貴自鄉邑來歸其喪以某

年某月某日塋某山某原因念公之子霆久廢於癘疾
慮無以紹其嗣乃請於朝以其仲子雲後公制可之併
以雲為國子生俾之有世祿焉吁哀恤之典厚矣公配
項氏贈淑人先十二年卒生男一即霆女三繼劉氏亦
卒側室生女三皆幼予曩在景泰初與公同年及第同
讀中秘書又同官翰林同居一坊交相契而往還甚款
密一日公與童庶子大章過予大章好譔浪喜悅相談
死生之理自謂其體太魁碩當不壽公亦清修不耐老

吾二人先死銘皆於予是屬蓋予僅長大章一歲死先
後未可知若公則少予十稔我銘當以屬公皆笑而頷
之後予去官南京二十年不遷大章卒予不及銘惜其
自立大節如不附石總兵求官至挽之不去解紛二朝
士廷辱石氏之黨上怒索其人而大章不妄指以寘已
責當時稱之而後世無傳焉予深有負於大章也頃予
被召北來而公之歿甫十日謂可圖踐言於公而公家
不予知遂不嫌自售請於編修君得其所述事狀為按

而序之蓋千載之傳雖不宜託之蕪陋謏淺之詞而片言之諾庶足以全夫朋友死生之義故不復他恤而卒為之銘銘曰仕既逢時位亦不庠直驚橫馳靡適不宜胡嗇其施而止於斯尚永於垂刻此銘詞

戒軒先生傳

楊璿

先生常郡錫邑人也諱善字擇賢姓馮氏故邑著姓高祖亨甫曾祖達卿皆業儒大父彥嘉福建都衛經歷父景春先生天才極高性剛果遇事不少假借故號戒軒

以自懲時學者未知所尚慕先生立言行已皆以屏斥
浮詞敦尚實行卓然為東南文學之倡年二十為州里
師摘發疑義為學徒陳道諸老生無能論難者長益肆
力文學期底於實用宣德初兵科給事中陳圯左遷邑
丞察其賢以經明行修薦為本縣儒學訓導先生辭不
獲迺曰廟堂之臣恢弘事業學校之官陶冶人才人才
成則事業見卑其職豈朝廷養士意邪乃拜受之先生
雖以書經起家而博通五經其論學術則曰五經一理

也兼通而時出之始克稱儒自漢以來儒者執一經以名家非所以博學而反約之也其論道統則曰斯道在天下有原有統原出乎天統存乎人吾邑自俞允諸公得接文靖之傳於紹興嘉定間既久而晦蝕數百載之下豈無上接其傳者乎乃建議以為聖賢乃儒教之根源道德之脈絡學宮舊有祠多歷年所浸至蕪廢今宜以中樞復祠文靖公以下五先生東樞則祀鄉先賢如唐李紳輩西樞則祀有功於學校如元虞薦發輩上書

當道遂從其議蓋先生以繼往開來為已任倡明道學力
拯頹風復還於正是以士子翕然從之而先生之革俗弊
不用浮屠大為時輩詆笑縉紳間亦有毀其難行者乃取
朱子家禮質以太祖高皇帝御製孝慈錄等書并朱子後
來所行與家禮不同者逐節筆之如喪禮舊以嫡繼慈養
母斬衰三年祭祀則四代共一祝板之類皆革去家禮舊文
一遵國朝制度如深衣續衽鉤邊喪禮惟父母用哀辟領
負版與夫祭禮冬至立春不祭始祖之類一以朱子晚年

所行為主家禮原文不復載錄以至引用諸書并漢唐宋以下諸儒居家雜議有可依據者卒為一編名之曰家禮集說叙而習之以立修齊之本大意以為時有古今禮有損益修而正之變而通之此家禮舊文雖少變於今日而未始失其禮意也知禮者是之其書遂行今江南士庶家皆遵之民風亦為之一變初先生父以誼誤備邊母悲哭喪明先生恭鞠侍養躬自洗濯衣不解帶者十年母目復明至是父歸卒廬於墓者三年有司欲

舉孝行先生以母老固乞近地迎養奏可復陞安慶
望江教諭先生自負甚遠恒欲章封事論天下大計
復念犯位卑言高之分則又歎曰時不我值命也奈
何一析去牙角既無所發其忠愛則以勸進後學為
事旁引曲諭務啟其聰明故出門下士隨才各足一
時登拔者獨盛於他郡嘗典江西鄉試黜浮崇實士
論多其得人景泰紀元以秩滿赴銓曹見撤民居為
巫立廟走告大宗伯胡公漢願罷其役詞氣激切胡

公壯之謂其心術正大不宜屈置閒散方將薦聞而先生竟致政歸當是時年六十三矣又十三年而預自為誌又三年而終得年七十有八其自誌曰昔孔明自比管樂時人莫之許今時人許先生有匡世之才卒靡冷官而止人皆惜之先生無悶也其教人以倫理為本詞章次之化導諄懇能得士心故沒而士子思之有司崇之錫山望江各崇祀於鄉賢祠有子三人泰濟豫泰世其業領丙子鄉薦其平生

所著扶樹教道有戒軒文集若干卷宣寄性情有戒軒詩集若干卷參訂古禮有家禮集說敦厚風俗有錫山望江二志其門人分職中外者自郎中李灝以下餘二十人具載先生自誌而獨以瑯為合志故於其歿也既表其墓以為天下慟復疏其事為傳俾泰附之家乘以俟史筆

論曰余讀戒軒等集知漢儒之不好法言也道之行廢命也先生為貧而仕非有行道之責既老不自休

抑有何也孔子云文王既沒文不在茲乎安定為蘇
湖授教門人皆有可觀後世與韓范並稱立功與立
言所得有不同哉然先生非儒官亦不能著書如此
云

戒軒先生預述墓誌銘

失名

戒軒先生錫人也馮其姓善其名擇賢其字父景春不
仕大父彥嘉福建都衛經歷曾祖達卿高祖亨甫皆不
仕卒戒軒平生讀聖賢之書樂聖賢之教求堯舜禹湯

文武之心志堯舜君民之志不戚戚於窮恒熙熙自足
年二十受徒州里三十九舉經明行修任錫庠師轉崇
明六十試官江西六十二致望江教諭政歸錫奉母終
老焉以父母即天地嚴加孝敬故於生事塋祭一遵於
禮不敢有違其為人性剛勁觸事易忤一毫對人若撻
市朝故號戒軒以自抑其性氣先生天才頗高識量亦
異於衆善料事人亦借服門人郎中李灝布政楊璿泰
謨馮誼僉事談泰府縣職陳給王納輩學職楊盛唐旭

輩二十餘人施政立事惟揚布政合其志嘗曰天下人才一邑人才也吾邑若此餘可類推後世不及唐虞三代者人才為之也恒欲封事時政不敢犯位卑言高之分吁孔明窮耕南陽自比管樂時人莫之許今時人許先生有匡世之才望先生有匡世之佐任卒靡冷官而止人皆惜之先生自若也使先生果能顯任其能匡濟否乎或曰先生志克舜君民之志得其位必行其學恐行其學不能阿順不得久居其位寇準韓琦貶斥未嘗

無也在朝見撤民居為巫立廟往告胡宗伯勸其力諫
罷其役憤切言激人笑其戇以此觀之可見其忠君愛
民之心正大矣雖然此皆空言特論心之所存而已先
生自致仕歸自以不能行道濟時恒歎於中錄醫方合
藥以拯民疾達家禮以正民俗修誌書以篤民風躬行
孝弟以敦倫理儉治家以杜華競鄉邦吉凶事咨訪而
後行奉母之餘惟琴棋適趣而已不預餘事以書經起
家教其冢子時泰登景泰丙子科吳啟榜鄉貢進授河

南涉庠教諭分俸就養于家天順六年七十五歲自感
康寧無恙安享天祿倣杜牧之生前自為墓誌越成化
乙酉六月十六日卒于正寢享年七十有八歲卜以是
年九月十六日塋于開原鄉惠巷之原從先兆也配盧
氏先卒生三子長泰娶秦叔象女次濟娶殷序賓女庶
子豫娶周信民女女一適談熙嗚呼若先生之生平出
處涉歷備至弗畔於道式克至於今日休亦百中之一
二耳懿哉乃系之以銘銘曰教官三紀歸老巖阿人以

為少我以為多存順歿寧吾末如何自吟不盡留後人
歌

明名臣琬琰續錄卷十三

欽定四庫全書

明名臣琬琰續錄卷十四

明 徐紘 撰

大學士彭文憲公言行錄

尹 直

彭時字純道安福人進士第一歷仕正統成化間位至少保吏部尚書兼文淵閣大學士卒年七十贈太師謚文憲

公自少端重寡言不與羣兒相狎戲惟奮勵讀書治春

秋從叔父僉憲及憲副二公學屬文輒有驚人語二公喜謂他日必為宗公及領鄉薦入國監博學精思為海內士所推服祭酒李文毅公尤以公輔器待之初入閣與泰和陳芳洲諸老遊公雖晚進積學素履殆無愧焉後復入閣英廟方倚任李文達公有事數召面議文達退即諮處於公輔益居多具有不可者每據理力爭不肯一詭隨初或意相忤久之心服其公且明語人曰彭公真君子也天順末錦衣衛指揮使門達甚見寵任忌

文達與相軋陰中傷之上曰李且得罪行專用彭某中
貴以語公公矍然曰李公何遽至此因為力辨其誣語
聞文達得釋河南有衛官頗強橫凌人刺事者誣其謀
反門達煅煉成之公曰人可輕殺耶具言於上竟得從
末減活其家數十人今皇帝嗣進吏部右侍郎兼職如
故是歲秋同知經筵丙戌乞歸省詔馳驛往還太監許
安致道理費長隨張敬護送抵家未踰月手勅促還朝
丁亥二月至上慰勞之六月以四川宣府遼東地震上

疏陳六事皆親切時政八月總裁英廟實錄成進太子
太保兼文淵閣大學士尚書如故戊子夏陳莊靖卒公
上疏言才識迂陋今冒居內閣首僚何以下副羣望乞
妙選出衆才賢擢居前任上曰卿輔導有年才識老成
何以辭為慈懿太后崩詔大臣議塋所衆相視莫敢先
發公曰梓宮當合塋裕陵主當祔廟此一定禮無可議
者具疏引漢文帝合塋呂后宋仁宗合塋劉后故事乞
念綱常之大體先帝之心必求其至當此實綱常典禮

萬一有違在廷百辟將有言之宗室親王將有言之天下之大萬世之遠亦將有言之豈能保其終無據理改而從正者乎上猶重違母后之意未允公與在廷文武羣臣伏文華殿以請或至嗚咽泣下上為之感動卒從禮制是秋彗星見越三台公上疏乞痛加修省而謂外庭大政固所當先宮中根本尤為至急望正名分均恩愛以廣繼嗣為宗祀大計又言大臣進退皆宜斷自宸衷不宜專任臣下如平昔察知其人或召吏部面議或

召臣等參詳庶權出於上皆嘉納之平涼土達滿四反
官軍連失利都御史項忠奉詔往撫捕之公料其必成
功而朝議洶洶咸欲再遣將出師公執不可或以危語
動公公不為動未幾獻俘至議者始服上嘉賜俘奴一
人已丑冬無雪上疏言自古旱災皆由下民困苦怨歎
之氣感動天變而致近日光祿寺之買辦各城門之抽
分掊剋太甚而獻珍珠寶石者私賄估直之人倍增其
直以規取府庫以萬民之供輸而為奸人之所侵奪伏

望盡革其弊以惠生民上是其言京師為之踴躍辛卯十一月替復見上疏言德政之要其一乞崇正道而毋惑於佛事其二乞謹命令之傳庶事出於一而無詐偽其三請退朝之暇延接大臣面議政事兼問軍民之休戚訪人材之賢否察治體風俗之得失其四言近聞譬倖無故而受金帛者多工匠無故而冒官職者衆是賞太濫也或罪不應謫戍而謫者或罪不至死而死者是刑太深也宜節賞慎刑以遵成憲其五乞以古之聖賢

為法聽受羣言勿惡其切直勿忽其迂遠苟當理者宜
即行之其六言股肱之臣耳目之司近多至於奉承而
嫌於違覆直行已意而不加斟酌乞戒勵各官慎修厥
職職股肱者事有不可宜再三執奏毋率意而行司耳
目者遇事為民病官為民蠹宜即劾奏毋徇情而默庶
百官奮厲興起事功其七乞清理三營草場減退豪勢
庄田嚴有司掎剋之禁庶軍民得所邦國永寧上曰然
卿等宜並勉佐理

太監劉永誠沒言具有軍功宜追封為伯公力爭之或曰自古有封王侯者公曰此盛世事耶祖宗成憲具在誰敢違之事遂寢壬辰天下水旱相仍復上疏言時政闕失乞放歸田里不許乙未正月陞太保尋復病蓋自己丑以后凡七在告上輒命醫視疾遣內臣致豬羊鷄鶩酒米之賜踰月不出則必再遣焉病革衣冠端坐徐言曰死生常理不足驚但冒居天位上不能報國下不能養老父耳無一語及私問之亦不應是夕遂不起三

月二十二日也公資稟既異加以問學之純自少至老敬謹如一日居閒無惰容行則兩手常端拱飲食不聞七筯聲尤不喜紛華先後蒙賞賚白金幾千兩綵幣數百鈔十萬緡冠帶衣服書籍器玩鞍馬飲食之類有加而公處之泊然終歲不一二宴會會未嘗有音樂於物尤愛惜雖片楮寸墨未嘗輕擲然非其義一毫不苟取與接人色莊氣和無疾言喧笑諧謔聲至於論辦事理則確然有不可拔者交朋友久而益敬人有善稱道之

唯恐其不彰論薦人材未嘗私以語其人常一典應天府鄉試一主考會試四為廷試讀卷官皆稱得人大臣間為新進所媒蘖者必反覆辨折且以愛惜人材之意上達言官以言語或微過被譴亦必委曲言其不足深罪賴以全者甚衆

並彭華撰行狀
商輅撰墓銘

尹直贊曰洵美文憲早躋木天粹溫如玉沉靜如淵歷事三聖抒誠秉謙不大聲色浮敦躁恬化機潛幹豈徒
代言

少保商文毅公墓誌銘

尹直

成化丙戌冬詔起前兵部左侍郎兼翰林院學士商公於淳安山中至則復職仍叅密務公辭不允乃感激就任累遷太子少保吏部尚書兼謹身殿大學士丁酉以疾懇休上察其誠從之陞太保兼職如故賜璽書金幣襲衣瑤鍬給驛以歸抵家十載始卒丙午七月十八日也距生永樂甲午二月二十五日壽七十有三訃聞深見悼惜贈特進榮祿大夫太傅謚文毅遣官諭祭者四

命有司營塋如制嗚呼始終榮哀至矣公諱輅字弘載
號素菴姓商氏始祖諱瑗宋嘉祐間自西夏都知兵馬
使來歸賜地于邑之山子孫因家焉三世俱以蔭補官
至祖敬中考仲宣咸因公貴累贈資政大夫兵部尚書
兼翰林院學士祖妣胡氏妣解氏俱夫人公幼穎敏卓
越宣德乙卯以壁經發解浙闈正統乙丑會試廷試俱
第一授翰林修撰尋命進學東閣務大期用繼選經筵
展書命遂進講已已陞侍讀擢入內閣時英廟北狩國

勢危疑妄有倡議南遷者公力沮之敵逼京城公與文武元僚經畧戰守遣官撫輯旬居之衆徵各邊師選兵入援揭榜其營購敵復偽為喜寧報誘擒額森書故遺于敵營敵得勝與書故自相疑遁明年景泰紀元之秋往迎英廟回鑒於居庸關草詔稱旨賜酒果馬足既而錦衣盧指揮妄言南內事窮治不已公言此不足信獄遂不竟壬申初議易儲公謂此國大事有皇太后在上臣下誰敢議此明日有旨會多官議附和者衆公爭不

可踰歲鍾同章綸相繼請復儲下獄禍不測公因召對
力救綸竟得免丁丑春景皇帝不豫公即與陳公循倡
請命復儲以繫人心不允繼具疏公援筆增二語陛下
為宣宗章皇帝之子當立宣宗章皇帝之孫擬詰旦進
至期變作正月十七日也先帝復辟首召慰諭且問改
元公對當同循等具請裁定又明日權奸嫉言官招撫
再劾坐免朝廷尋知非辜欲復用不果公家居怡然養
母訓子杜門不出及復起首疏八事舉切時弊戊子以

地震乞罷論以方託調燮豈宜去是夏詔議慈懿皇太后堊禮公同彭文憲公力言附陵祔廟理不可易至率廷臣伏闕泣請卒從尋因彗星見言官有所誣詆公力求退奉旨朕用卿不疑何恤人言至詰責言臣曰唐太宗用王魏朕用商輅何不可欲加譴調公言臣嘗勸優容言官已荷嘉納如修撰羅倫復請召用今因論臣而反責之如公論何特允所言召公至榻前勉慰再三尋陞尚書仍兼學士蕃長滿四叛官軍往討未下廷臣規

再出師邀功有危語公與同官執不從未幾捷至上喜
賜公等俘奴各一已丑冬燠公陳時政之弊辛卯冬彗
見復疏八事壬辰以天下水旱相仍請省科歛減力役
寬兩稅弛利禁悉從之是冬奉敕修續資治通鑑綱目
乙未夏進兼文淵閣大學士丙申加太子少保改吏部
賜冠帶一品服時禁中建玉皇閣公論毀之又請建儲
尋因墨肯見極陳時弊丁酉兼殿學士時內臣汪直創
西廠刺事權傾中外公與同寅指斥激切即為革罷公

亦決於去遂得辭公配盧氏封夫人先卒勅塋邑西山
之原子男三長良臣第進士仕至翰林侍講先公兩月
卒于京次良輔以公蔭授禮部主事孫男四汝謙國子
生汝順邑庠生汝晉汝泰女四曾孫男四良輔將以卒
之明年某月某日奉公柩啟盧夫人之封而塋焉前事
以太常卿兼學士王臣所述事狀屬銘直公門生素承
愛重方聞訃悲慨不勝銘何敢辭惟公丰儀山立襟度
淵澄詞氣溫徐平居敬慎不懈接人恭遜早擅三元旋

登內閣以經濟為已任以薦賢為已首務間論古今治
亂事機得失賢否疊疊不倦文牘盈案裁決如流中遭
誣間夷然不校權奸既敗事白復起倚毘益切建白良
多雖一時僉壬傾之舉無能為卒之身退名完德業著
于當時風聲聳于後世視古名相碩輔如勃之厚重崇
之應變旦之沉靜亦何忝哉先後蒙賞賚金幣冠服書
籍鞍馬飲食之類頻腆而自處泊然嘗一主考會試五
為廷試讀卷官皆稱得士於書無所不讀為文渾厚雅

瞻詩主平淡不雕刻有集若干卷傳于家蓋一代偉人
宗工銘以昭之宜矣銘曰天佑皇明川嶽鍾靈篤生魁
傑為時偉人有偉文毅早擅三元薦登內閣叅秉衡鈞
展志行道克濟中興尋遭變故東歸角巾坦懷泊慮
訓子奉親蠅玷自白寵命更新匪躬匪懈弼亮經綸因
天示變讜言屢陳宸衷孚契海宇義寧明良魚水今昔
奚頻羣比醜正力辨以貞松栢挺秀陰靈廓清倚畸方
切其如功成辭盈戒滿奉身完名涼風曝日洛社耆英

慶延哲嗣澤在斯民諸福克脩始終哀榮流芳百世視
此銘文

副都御史魯公墓志銘

尹直

都察院右副都御史魯公奉勅巡撫甘肅也甫下車即
嚴明號令簡閱部伍振張領目補剔利弊兵備咸飭聲
威遠著敵兵不敢南牧朝廷可無西顧之憂矣無何遽
聞父喪請歸守制屬邊務方殷代者不至弗敢輒離日
尚墨衰從事摧毀勞勩形神瘠耗疾作不可治卒于闕

內道之公館實成化丙午八月十日也有司歛襲如禮
歸其喪訃聞上深悼惜遣官諭祭命有司治塋域卹典
厚矣其孤以予為公同年素相善持同都副都御史李
克承所述事狀來請銘按狀公諱能字千之姓魯氏居
世寧國涇縣魯祖通寶國朝洪武初以民兵守禦宣州
有功陞總旗十七年調廣東新會縣守禦千戶所子孫
遂為新會人祖諱保輓考諱真號素軒先生以公貴累
封戶部員外郎妣周氏繼母陳氏俱宜人公資質端重

性聰敏早嗜學素軒喜曰吾世武弁以儒業起家必是子也遂遣從經師游年十六選補邑庠弟子員勤勵不懈學大造詣景泰庚午以書經領鄉薦甲戌登進士高第觀政冬曹時永興王薨公奉命營塋事提督有方事如期集還朝除南京戶部四川司主事天順戊寅丁周宜人憂辛巳服闋改戶部山西司初考績最推恩給勅封贈父母成化丙戌陞員外郎明年以繼母喪去官辛卯起復改江西壬辰考最給誥推封如制尋陞湖廣司

郎中癸巳陞陝西布政司右叅議戊戌進左叅政庚子陞右布政使尋轉左使甲辰陞都察院右副都御史巡撫甘肅公歷戶部曹務繁劇區畫綜理嚴密而均適國用以舒司徒多倚重之在藩時分守臨鞏二府清水縣城久圯敵兵卒至公親率官兵且築且戰城成敵自遁去繼奉璽書總理各郡三邊糧餉都行三司屯糧徵運以時遠近有等而民力不疲每歲戶部給來糴米銀數十萬兩舊多乾沒於權要公估直分糴倉合無虧而

兵食以足創會計堂一所於公堂之左凡民徭邊儲洎王府祿米所當預計者則集僚佐籌度其中務在均節官民兩便故歲雖祲無稽逋甲辰歲郡亢旱不登民相食公處禱郡望百方區畫古今救荒之宜舉行殆盡由是多所全活雖間至死不怨而一方卒賴以無虞公之力居多朝廷嘉公勞勩肆有巡撫憲臣之命是年十月也公生宣德戊申九月二日娶羅氏有淑德子男二長文衡次文鑑嗚呼公為人溫厚坦易慎交際口不道人

過失至論公事則執定見侃侃不回職所當為鞠躬盡
瘁歷官三十餘年位躋三品甘嗜淡素如布衣時蓋志
在澤民安社稷而已銘曰嶺海之間清淑攸萃惟我魯
公穎越羣類早與計階甲科廷對薦歷民曹國賦充倍
出牧陝藩旬宣罔懈振張領目簡畧苛碎屬歲大祲百
方振貸億萬生靈撫摩勞來民免流亡感激愛戴僉曰
微公此生豈再令聞以昭帝心簡在制曰爾能敵吾所
懷乃遷都憲凜凜風裁惠滿棠陰威行榆塞素志方伸營

星奄墜卹典既優弗壽奚慨勒詞貞珉昭示永代

工部尚書謝公墓志銘

尹直

皇上臨御廿有三年既久於總攬洞鑑羣情乃赫然渙
比純違更置一二大臣首召直於南都叅典密務且起
致仕都憲劉公叔融正中臺繼擢李公咨德位冢宰公
位司空劉公召和為少宰黃公文昭貳宗伯吾江右士
夫素以剛介寡偶一旦聯陟輿論翕然稱快予輩感激
胥規誨矢心匪躬期不孤簡任而工部政務尤號猥冗

公方去翰墨躬校案牘嚴勾稽剔蠹弊謹物料出納之數正匠作逋匿之罰工師宿黠者悉逐斥之不得近左右凡有營繕必計程期慮財用以授屬職廉能者董之故費出有經力役無困明年春公得疾疾在告三月上書辭俸優詔不允疾少間亟出視事病復作是夏五月十九日夙興盥頰訖衣冠出坐小齋溘然而逝訃聞上深悼慨特賜鈔萬貫贈太子少保遣官諭祭再命有司治塋如制益罷任方隆而遽不祿惜哉其孤紀以刑部

侍郎何公廷秀所述公事行丐予銘天順庚辰予同考
會試得公卷列之第三為天下書經魁進試于廷英宗
皇帝覽公所對策嘉悅之擢第一傳臚之旦褒然衆中
縉紳屬目閣老李公文達尤喜得人後有及第者輒曰
安得偉器如謝某者乎除翰林修撰同庶吉士讀中秘
書由是所學益博而精上初嗣統進公侍經筵被賞賚
預修英廟實錄據事直書得史官體書成陞左春坊左
諭德加賜銀帶尤腴繼修續通鑑綱目時預修者僅十

有四人公分修元史凡所褒貶一依朱子書法多正前史之繆既成進御陞翰林學士宴賚有加嘗因星變上疏陳五事一正宮闈以端治本二親大臣以詢治道三開言路以決壅蔽四慎刑獄以廣好生五戒妄費以足財用忠懇剴切多人所難言者丙戌同考會試甲午主考南畿鄉試鑒別精明得士居多戊戌皇太子出閣詔簡儒臣侍講讀公與焉庚子陞禮部右侍郎凡制度儀文多所裁定前所未有者必稽經據史叅以時制其為

儀注務使考行一時同事者咸推公練達故遷司空政績卓然有非迂腐者可比公諱一夔字大韶姓謝氏其先本晉太保文靖公安之裔世家南昌之古源祖永亨避仇匿姻丈王氏家遂從其姓及公貴顯廼請于朝復謝姓曾祖公政祖即永亨父得仁福建汀州府推官俱累贈資善大夫工部尚書前母關安人母范氏俱夫人郡推始授汀經歷以廉惠得民被薦陞推官讞獄明恕正統己巳沙縣大盜起攻圍汀城勢熾甚郡推集民兵

助閩帥守禦屢剋賊鋒圍既解官軍誣執村氓四百餘
衆為賊又為力辨得釋民德之尋卒子行營汀人建祠
焉公嘗得告歸省先塋因往汀祠祭奠遺民迎拜歡然相
愛皆嘆公賢貴信為郡推陰德之所致歟公娶鄧氏累
贈夫人先公三年卒勅葬邑之闕山之原至是諸子

卜以闕

年某月某日奉公柩合窆焉子男三長綱鄉

進士早逝次紀次經孫男五騏邑庠生驥國子生次鳳
驊俱習舉子業惟公天資溫粹性樂易待人接物一

本於誠未嘗有所忤故人無貴賤咸愛敬之尤篤於友
誼有悞罹法網不能自白者必語所司為辨之或材可
用而淪抑下僚者薦諸當道不幸客死為歸其喪或卹
其孥又置義學以訓鄉族子弟置義田義倉以賑貧乏
皆仁厚之所推也公自少至老好學不倦所著述不為
奇崛雕刻之詞而溫厚詳雅類其為人有古源文集若
千卷藏于家初公從侍讀尹鳳岐先生游先生語人曰
大韶他日所造吾不及也吾於父子間見之矣卒以大

魁官學士位司空文行功業所成若此先生之言信哉
予少公二歲先入翰林及公一蹴位予右顧以座主見
待不少違然同官同事朝夕洽比凡二十年予乃出二
春卿改南都睽隔久之幸復同躋崇秩重期白首相周
旋孰意永訣予尚忍銘公之隧耶然匪予銘其誰宜銘
曰皇明傑魁多出江右有偉謝公早種靈秀經史博通
義理精究先皇策士惟公實裒華秩崇資榮躋顯授論
思獻替蜚英騰茂纂書典禮正訛刊謬聖明勵精任人

求舊賢碩彙興駕行聯蓬公陟司空剗裁紛糾宿弊以
清人望以副推公先君式遏亂寇開釋非辜陰德實懋
公食報宜盡自天祐名位既崇胡勿遐壽壽雖弗遐卹
典優厚天匪昧茫殆昌厥後勒銘賁幽永世無朽

明名臣琬琰續錄卷十四

欽定四庫全書

明名臣琬琰續錄卷十五

明 徐紘 撰

懷遠伯襄毅山公神道碑銘 王 偉

書曰天惟純祐命則商實詩曰維嶽降神生甫及申維
申及甫維周之翰是則上天眷祐人君必賚以非常之
佐然後可以成莫大之功有若故特進榮祿大夫右軍
都督山公殆所謂非常之佐者歟按行狀公諱雲字闕

父諱青洪武初隨侍太祖高皇帝平定海內以功授
燕山左衛百戶已而從太宗文皇帝奉天征討歷陞中
軍都督僉事母闕氏封闕人永樂元年都督公以疾卒
于官公以冢嗣襲任金吾左衛指揮使節隨車駕征迤
北功為諸將先調府軍前衛掌印尋陞中軍都督僉事
宣德二年奉宣宗章皇帝制諭充總兵官掛征蠻將軍
印出鎮廣西先是廣西溪洞猺獞叛服不常數為邊患
公至鎮之以靜照之以仁嚴號令公賞罰親率官軍與

叛賊韋朝列等前後十餘戰臨機應變能以芻先士卒
故所向無前斬賊首凡一萬二千二百六十九降賊酋
三百七十七獲被賊抄虜男婦二千五百七十九俾各
寧家擒虎豹三百四十獻于朝築永平等九堡葺宣武
等四城叛舖舍五百二十七由是蠻夷懾伏居民按堵
天子嘉其功進公右軍都督同知賜紅織金羅衣一襲
仍下詔獎諭有廉能公正善撫軍民實副委任之語今
上皇帝嗣位念公守邊日久厥績茂著廼賜以白金綵

緞正統三年九月二十日公以疾卒于鎮有司以聞天子嗟悼輟視朝一日遣官諭祭命工部營塚壙贈公卒之明年二月六日歸塋先塋之次墓碑未及樹子俊以疾不能任事白于朝以弟泉代厥官泉乃以碑文為請嗚呼若公者可謂非常之佐者矣公安貌魁梧善騎射曉兵畧持已以慮慮事以慎甘苦與衆共之故臨戰人皆出死力殲強圉若拉朽腐用以保障生民其卒也西廣之人為之立祠塑像歲時祭之其得人心可知矣公

生某年某月某日享年六十有四夫人吳氏金吾衛指揮之女有懿行子男六人長即俊次即泉能嗣其業次璽信義讓孫男三人嵩崧若予雖未嘗識公然公名在天下藉甚銘固不可辭銘曰桓桓虎臣為國之輔風秉忠誠動遵軌度粵嗣先秩擢長萬人侍從龍旂克清塞塵繼握重兵出鎮西廣屹然保障下民是仰恩威并著聲勢流聞智超百將勇冠三軍禦侮禽奸綽有奇畧號令一施聞者膽落榮祿之秩廉正之褒宸章煜煜予以

報勞西廣之人賴公之佑昕夕籲天祈公永壽天胡不
憖遽然而終訃聞于朝天子忉忉褒卹之典特為優異
匪私于公以勸來裔公之義氣炳然丹青下則河嶽上
則列星我作銘文勒諸神道百千億年永永有耀

永寧伯譚公行狀

尹直

公諱廣字仲寵姓譚氏丹徒河間人也父諱添四當太
祖高皇帝起義濠梁居戎籍從大夫湯克金壇常州攻
江陰又克蘇明等州遂留禦明州收捕蘭秀山以終時

公年十四補父籍繼被選入補驍騎衛復調府軍為伍
長帶刀宿衛誥授詔信校尉燕山中護衛百戶從征諾
爾巴哈轉燕山左護衛又征驢駒河黑松林諾延山等
處已而從太宗文皇帝奉天征討上知公驍勇有謀命
率百騎候東安涿州公生捕得還卒輒械以聞上益親
信遂從攻真定取永平下大寧還戰鄭村塢以功陞千
戶又取廣昌克蔚州圍大同鏖戰白溝河攻濟南陞正
千戶及破滄州戰東昌定州夾河轉藁城進攻順德皆

奇功因留守保定陞指揮同知尋陞指揮使會都督韓觀等率兵十二萬來攻公以孤軍晝夜相拒四十餘日糧且盡公嚙指裂背左區右畫竟以飛礮擊走其衆陞大同都指揮僉事永樂改元營建督運殿材紫金關七年入見留北京領神機營從上征迤北封神機驍騎將軍由玄冥河追趕布尼雅實哩至靜遠鎮殺敗阿魯台復征擒胡山還守大同十二年復從征九龍口敵騎數萬憑崖而陣勢張甚公為前鋒以神箭手萬入射傷其衆

賊驚潰顛坑骨木死者殆萬計公乘勝指揮兩翼以進
夾擊之繼以步刀斫其馬足賊大敗去比還上指謂廷
臣曰廣之知勇雲長敬德不足多也陞中軍都督僉事
有白金綵段駕馬襲衣之賜且俾中貴護至其門仁宗
嗣位陞左都督制克總兵官出鎮宣府時冬寒上念公
備禦於外追賜楮幣綵緞即掛鎮朔將軍印暨于宣宗
尤加褒異勅曰念卿總戎攄忠效謀躬勤夙夜有白金
綵緞之賜逮今上皇帝既御大寶勅曰卿祇事祖宗多

歷年所出鎮邊疆厥績茂著特遣人喻意復賜白金綵
緞正統六月以征勦邊寇功詔封永寧伯七年給誥勅
意若曰爾中軍都督府左都督譚廣忠實能勤材智有
為事朕皇祖曾於藩邸翊清內難從征北方克振武威
暨事皇祖皇考至于今鎮守邊方幾二十載屹然長城
之固疆宇晏然念勞勤之既久宜恩數之渙頒今特授
爾奉天翊衛宣力武臣特進榮祿大夫柱國永寧伯食
祿一千一百石仍與爾誓除謀逆不宥外其餘雜犯死

罪免爾一死爾惟欽哉正統九年上閏公年老不忍勞
以事命武定侯郭公往代其任驛召公還未幾而告薨
上哀悼為輟朝一日遣官祭弔申勅有司治塋事王公
大臣咸有祭公為人長身玉立膂力絕人忠義之氣大
百餘戰戰必勝然未嘗妄殺愛人下士恒恐不及士卒
勤勤不啻在己寒為之衣飢為之食故公之去也人慕
之其薨也人哭之咸盡哀公初所統神機兵鮮明晃耀
進退有度人望見皆曰此譚家馬也上有所指揮亦曰

譚家馬至敵人相戒亦曰慎毋犯譚家馬迄今猶以為
號所得祿賜一不以私贏均為學舍浮屠老子之宮
之用嗚呼若公者雖古之名將何以加茲公生于元至
元某年某月某日薨于正統九年某月某日曾祖諱某
祖諱某考諱添四皆贈榮祿大夫柱國永寧伯曾祖妣
某氏祖妣某氏妣某氏皆贈太夫人配王氏封夫人子
男三人表亨襲永清衛指揮使次商次高孫男若干人
亨將以九年十月日奉公之柩歸塋保定某鄉之原泣

請予狀公行實用乞銘于太史氏某為公之門下士知公頗悉故不辭而述其槩若此云

工部尚書李公神道碑銘

楊士奇

太宗祖皇帝初奉藩北京建文中廷臣有因齊藩不法遂建議凡藩國所在更置守臣於是擢張曷為北平布政使曷日求王府細事將為不利其史李友直密聞于太宗義師既舉遂擢用友直友直質樸直諒知無不言甚見嘉獎日益信任出理饟運入嚴城守率以命之殫

力竭慮事卒蚤集而咸稱上旨初授北平布政司右叅議既建北京改布政司為行部陞左侍郎時初作宮殿繕務殷繁經度提督躬任其勤勞蚤莫弗敢懈改行在工部侍郎仁宗皇帝臨御嘉念舊勞陞行部尚書奉命代祀周文武成康陵及秦愍王既還言關中民瘼深見嘉納賜誥命并追贈祖考妣請告焚黃遂立碑于墓以侈上恩光昭先德宣宗皇帝嗣位改雲南工部尚書嘗奉命董採殿材於蜀設施有方撫綏有成勞者不怨

自是朝廷凡有興作重役悉以付之其臨事有條理而體卹下情所行悉公是以人從事集訟誹不興而屢承勞賜焉友直字居正為人坦夷闇敏雖不與物競而持已正直不屈於物有恤人之心施濟弗惜與人言必歸於忠厚有之官往辭公者必勉以愛民之政與人交惻款緩急率得其力度量有容屬司之貪詭者以公長者數欺慢之公雖知弗校清議以是益重公春秋七十而卒正統三年某月某日也訃聞上賜祭命工部營繕塋

禮部賜祭公卿以下皆往祭之李氏之先隴西人元季其曾祖山徒保定清苑自是以來皆隱處不仕而篤於善行祖彥名父人義皆贈資善大夫北京行部尚書祖妣臧妣杜皆贈夫人先十七年卒繼劉及王皆勤內助子男三昉暉惕孫男四魯孫男四諸子將捧薦歸厝清苑先兆昉奉吏部尚書郭公所述事狀詣予請文於神道之碑余嘗先銘其先塋矣然與公同事四朝雅相好相知故不辭為叙而銘之銘曰遙遙隴西李所自來徙

清苑屬元季曹穰之鄉柳莊里土剛水清毓和粹絲曾
大考暨祖稱積仁累厚襲休祉式生居正用奮起據厥
純誠事藩邸義旅之興殫勞瘁高城浚池固根底聯車
連轡給饗餽左馳左驅效智謀乾坤既正廓氛翳煌煌
天寵峻祿位藩垣超涉冬卿貳冬卿申陟極所至守身
泣務嚴劾竅肅肅在公靡怠易心信秉仁處當義恤窮
矜鰥急施濟量度恢豁內昭晰有詭罔之弗校計恭事
四聖誠一致七十全歸行靡愧必有繼述垂後世故鄉

之墳歸率制疇其銘者太史氏

禮部左侍郎李公墓誌銘

楊士奇

宣德七年十月十五日禮部左侍郎李公卒于家訃聞
上遣官賜祭師傅六卿而下皆往弔祭卜明年某月某
日塋闕縣某鄉某原具孤栗以治命奉翰林侍讀苗

君衷所述事狀來請銘禮部尚書毘陵胡公申為之言
予與李公同事三聖凡三十年乃按狀叙而銘之李之
先居平陽之臨汾大父諱仲智父諱師魯元季隨兄希

賢宦游燕都遂占籍宛平縣而公生焉公諱嘉字允堅
天資凝重不妄言笑自幼卓卓有立志事親孝稍長縣
大夫選邑學弟子員前大學士董公倫時為學教諭公
從受業旦暮自策勵所授書率誦讀數百過四書注釋
雖老不忘已而念家貧親老丐罷歸侍養為師者初惜
其去遂獻詩達意其辭懇切師憫而從之後選奉祠所
禮生事太宗文皇帝於藩邸敬恭祀事恒致其誠無幾
丁父憂哀毀動人終喪不飲酒食肉覽父手澤未嘗不

流涕而養母愛敬兼盡初世父希賢死於兵無子倉卒
藁葬公念及輒悲竟卜吉壤備禮而葬為文皇帝靖內
難預效守城勞時南兵逼城城外民有負母入城無所
依者公避舍以處之且食之粟民母子得全於急義率
類此內難平錄守城功召至南京有司奏授鴻臚寺班
數月上親擢為通政司叅議且面諭之曰以爾誠實故
擢真要地必勤必慎毋忝朕命公益盡心力職一日奏
事畢自陳臣有老母在鄉里無兄弟侍側願躬迎母就

祿養從之既至時初建北京奉命董運木之役於河南
憚其智慮夙夜不懈後喪母哀毀如喪父詔賜棺及驛
舟歸其喪服闋仍前職遂扈從北將自是巡行皆預扈
從後坐累左遷鴻臚寺丞仁廟御極陞左通政使又坐
累左遷未行上嗣大統復通政使改北京行部侍郎念
其老不堪繁務又改禮部侍郎公雖精力日衰猶勉強
從事未嘗少間再歲以疾聞賜勅褒諭命致仕又數月
不起享年七十公持身端謹一介不苟取予剛方嚴毅

人不得干以私其任職細務必親故所歷寡合終不為
變治家整肅教子係必務學而閒暇道說國初以來北
京名賢故老流風餘韻娓娓不窮聽者忘倦蓋自是能
知而言者鮮矣其歷任散官自將仕佐郎積至通議大
夫以公貴再追封二代大父父皆至通議大夫禮部左
侍郎大母吳母榮皆淑人追封故妻蔡封繼室趙皆淑
人子男四栗直剛簡孫男四震謙泰吳銘曰嗚呼李公
有孝有守遭逢龍興陟帝左右剛毅之資自信勿疑顯

顯以特莫之或移納言之司宗伯之貳歷年三十終始
一致白髮蒼顏鞠躬竭誠三聖在上天鑒孔明奎章龍
文奉勅歸第象笏朱衣里閭迺拜從容優游以壽考終
綸音及門寵光隆隆嗚呼李公生死榮哀勒銘其藏永
示後來

兵部尚書兼詹事金公墓碑銘
楊士奇

永樂十三年四月十五日兵部尚書兼詹事府詹事金
公得疾明日強入朝退疾劇又明日卒公世鄞人自少

慷慨闊達負氣義壯遊京師遂遊齊魯趙魏以達於北
京居北京二十年初舉義靖內難布衣入見署紀善
遂從征伐明年署長史又明年陞工部侍郎永樂二年
陞兵部尚書兼詹事府詹公事上敬慎小心每被顧問
知無不言退未嘗泄以是益見禮遇而委任益篤焉輔
導儲君以正直自持言無不盡尤見優待遇同列論事
徑情直發不肯持兩端依阿而虛已服善沛然若決江
河注之海也兵部機務繁劇公嘗推讓同官之賢能或

一事失當則必自引咎人有片善必稱之雖有素與公
異意者其有他善未嘗不稱也里人有數窘辱公公為
尚書時其人補吏來京師懼不為容公薦用之或曰彼
不於公有憾乎曰顧其才可用奈何以私故掩人之長
尤好獎掖善類士有得一官而往見公者必戒之曰國
家待士厚所望為民造福耳所至一以濟物為務聞人
出片言語涉暴刻輒艱然色變可謂公直慈厚者矣襟
懷坦夷神情灑落政務之暇朋從往來酒一壺棋一局

詠歌談謔相得也事兄世華盡恭撫兄子如子篤交誼
朋友卒其子無依公為長育之亦有長育之而為之娶
婦者其他賙貧恤喪塋所濟尤多傳於史學每論當時
成敗治亂之故娓娓千數百言不竭其源委曲折歷
歷如身親覩之者享年六十有三初病且革尚書蹇公
侍郎盧公往候之間所欲言公曰命至此何言獨念忠
始以一夫見上歷數年位列六卿寵極貴盛而未嘗效
分寸之報忠即死能瞑目哉已而顧其襁中兒謂二公曰

忠不能報上恩矣士奇必志上所以寵我者銘我庶幾
兒長而或有知也訃聞上為文祭之有曰殫竭心膂克
勤夙夜小心慎密始終無間皇太子為文祭之有曰能
盡乃心知無不言助益多矣又曰老成忠厚方賞之為
輔而遽沒焉嗚呼觀公君臣之際始終一德生榮死哀
何其盛也公諱忠字世忠祖漢考文英以公貴皆贈資
政大夫兵部尚書祖妣樓氏妣馬氏皆贈夫人娶余氏
封夫人子男一達公歿時達生始六月明年二月元子

復初奉公柩歸塋鄞之某鄉某原士奇素辱公知義不可辭故叙而銘之銘曰神龍御天雲翕從之千載之會特惟昌期金氏之先宅於東浙世篤善仁蓄涵未發如種必獲迨公奮興明良相逢助自北京奉天靖難公侍帷幄寅恭慎密畀以心腹邦國載寧榮秩顯命爰貳冬官遂掌邦政遂輔儲君宮臣之首公德多有公存孔厚古之君臣有終不常偉公之終隆隆寵光難名如天維帝之恩公沒惓惓庶其後人鄞原之墳湖山鬱盤歸焉

期藏永永其安

新建伯榮僖李公墓志銘

楊 溥

公李姓諱玉孟輝字也先世居真定之曲陽至考士中
涉河間交河今為交河人高祖誠曾祖德榮志田園不
求聞達祖雄元上都萬戶士中有孝行樂賑施以醫藥
濟人所治輒效未嘗責報鄉人德之皆以公貴贈中軍
都督僉事曾祖妣祖妣皆贈夫人母趙氏封夫人公生
而英敏異常見甫成童代父戍營州洪武己卯太宗皇

帝舉兵靖難自大寧歸附從征所至皆捷若鄭村壩白河東昌威縣夾河藁城靈壁大戰皆有功隨駕至淮度大江入南京及扈從北征至玄冥河追殺敵人布尼雅實哩由靜遠鎮出廣漠成敗阿魯台湖州草寇嘯聚奉命率南京軍合陽所統武侯軍討平之上每北征皆扈從嘗命總後營宣宗皇帝征武定州總軍扈從北還命守彰德復命從征烏梁海亦預有功公起行伍以奉天將事士由總旗陞百戶再陞指揮僉事壬午冬陞真定衛

指揮同知永樂庚寅以殺敵人功陞指揮使調府軍前
衛領功軍隨侍皇太孫洪熙乙巳宣宗即位念公能陞
都指揮同知丙午陞中軍都督僉事己酉春進封奉天
翊衛宣力武臣特進榮祿大夫柱國新建伯歲祿八百
石賜券誥是冬奉命往陝西明年往湖廣改調西安武
昌護衛正統初命總禁軍公歷仕四十年小心敬畏受
知列聖金帛甲冑器皿諸物恒有賜賚而能約以自處
人以是多之辛酉夏以疾告命太醫院給醫藥疾亟自

序遭際恩榮愧無以報遺訓子孫永世無忘八月庚午卒壽七十三訃聞上嗟悼輟視朝一日遣禮部尚書胡公諭祭于其第勅有司給齋糧麻布治棺塋塋追封新建侯謚榮僖配趙氏封夫人相成厥家族里稱賢子男七長英次源先卒次海次賢次良次闕次闕女二長適府軍衛百戶范達次在室孫男十二曰奇曰信曰佐曰闕曰倫曰儼曰健曰稱曰闕孫女三皆在室曾孫二曰政曰闕卒之年某月某日葬懷柔縣某鄉某原英奉中

書舍人張弘所述行狀請墓銘銘曰維公展也多才詡
歷事四朝勲日著厚祿榮封申眷顧貂蟬先接獲龍武
越肯駿奔義旗舉風虎雲龍千載遇玄冥河北廣漢城
瞻言昌旄奮厥武歸侍東朝司禁旅有偉具體約以處
全而歸之有遺裕爵謚褒嘉駢錫與子孫振旅保厥緒
懷柔之原良撫撫千百億年安以固

豐城侯茂國剛毅李公神道碑銘 楊溥

公諱彬字文質姓李氏鳳陽定遠人父信善騎射少從太祖高

皇帝征伐以戰功累官明威將軍四川衛指揮僉事後以老疾致仕公方弱齡補文官即知名成人上下交譽之洪武庚午率所部兵從潁國公征北方歷諾延鴉兒諸山追襲敵人阿達實哩至洮河兒獲人馬數十復歷黑嶺寒山諸處至熊皮山追襲敵雙和爾罕時太宗文皇帝居潛邸聞公智勇深嘉賞之明年公巡視宣府興河保安隆慶懷來諸邊城尋以公父信為遼東都司都指揮使癸酉命公董率築宣歷德倦口城巡視邊關明年復命公率兵築萬全

懷安城又明年命公率兵征哨泥河營黑松林諸處至
哈刺之地乃還敵人遠遁庚辰文皇帝舉兵靖難命公
率兵攻薊州遵化克之以功陞指揮同知又攻雄縣莫
州克之陞都指揮僉事復克大寧城又克敵於鄭村壩
克廣昌蔚州大同諸城明年夏於白溝河大戰以功陞
都指揮同知進克滄州壬午於滹沱河單橋築城諸處
克敵追至彰德出哨定州陞右軍都督僉事又於楊村
交戰被鎗止即遣醫視之賚予優厚俾還北平公辭曰

臣本戰士豈以微傷自餒願隨軍效犬馬之力上不允
命輪世子守城癸未命公率兵護中宮至京師永樂甲
申上以四方既平乃論功行賞念公之勞居多封奉天
靖難推誠宣力武臣特進榮祿大夫柱國豐城侯食祿
一千石子孫世襲自是委托益重乙酉命鎮江西丙戌
命巡皂君山丁酉命征交趾有功加祿五百石己亥勦
平東海倭寇庚子督操江尋命往長沙討賊孝法良獲
之辛丑命捕福建海寇癸卯命佩都督前將軍印總兵

守甘肅大振軍威邊境警伏丁未隨駕至京命佩南征
將軍印總兵守交趾遠人莫不仰德畏威南僊晏然在
鎮六年以疾卒時永樂二十年正月十五日也交人莫
不罷市巷哭其德澤及人深矣訃聞上為之震悼輟視
朝一日加賜賻儀追封茂國公諡曰剛毅遣官諭祭復
追封三代祖考皆上公妣皆公夫人子男四人長曰賢
故嗣封豐城侯次芳次恭次禎孫男二人長曰勇今嗣
封豐城侯次鉞嗚呼公以武士遭遇龍飛之運乃能建

勛庸胙茅土東往西討迄無寧歲可謂國之勞臣矣是
豈可以不銘輒因勇之請序而銘之銘曰桓桓李公慶
時之逢僞武揚威克效其忠統其父兵所向無敵長驅
敵巢左右搏擊烟塵既清武備是營飭彼邊城大振軍
聲靖難之師惟公義勇奉戴真人不震不悚通侯之爵
帝寵是加世澤之延與國無涯公復何心憚其智力奉
命周旋曾不少息或鎮邊方或殄強梁意氣之盛泰華
軒昂終于炎荒莖於畿土史臣勒銘光昭千古

明名臣琬琰續錄卷十五